



Þarf starfsfólk veitingastaða að nota hanska og/eða andlitsgrímur við vinnu á COVID-19 tímum?

Strangar reglur gilda um hollustuhætti við framleiðslu matvæla og opinbert eftirlit er með því að þessum reglum sé fylgt. Öll matvælafyrirtæki, veitingastaðir meðtaldir, verða að hlíta þessum reglum. Hollustuháttarreglurnar eru settar til þess að tryggja öryggi matvæla og til að koma í veg fyrir mengun þeirra, þ.m.t. mengun vegna sýkla og munu því einnig gagnast gegn COVID-19 vírusnum í matvælafyrirtækjum en engar vísbendingar eru um það að hann berist með matvælum.

Matvælafyrirtækjum ber að viðhafa góða framleiðsluhætti og hafa virkt matvælaöryggiskerfi. Í því felst m.a. að þau þurfa á öllum stigum framleiðslunnar að þrifa og sótthreinsa húsnæði og búnað sem notaður er við framleiðsluna, hindra krossmit, tryggja að starfsfólk fylgi umgengnisreglum og reglum um persónulegt hreinlæti, eins og þvotti og sótthreinsun handa, rétta notkun viðeigandi vinnufatnaðar/hlífðarfata og að vera heima en ekki í vinnu ef það er veikt.

Samkvæmt núgildandi reglugerð heilbrigðisráðuneytisins nr. 1051/2020 skal nota andlitsgrímur þegar ekki er hægt að tryggja tveggja metra fjarlægð milli ótengdra einstaklinga. Á flestum veitingastöðum er ekki hægt að tryggja tveggja metra fjarlægð milli starfsfólks og því skulu starfsmenn veitingastaða nota andlitsgrímur við störf sín.

Hanskanotkun kemur ekki í staðinn fyrir góðan handþvott með volgu vatni og sápu. Því er ekki gerð krafa um hanskanotkun ef handþvottur er stundaður á réttan hátt og nægilega oft. Ef notaðir eru hanskar skal ávalt þvo hendur áður en farið er í nýja hanska.

Það er einnig skylda, að starfsfólk veitingastaða eins og annarra matvælafyrirtækja, fái nauðsynlega þjálfun og fræðslu og því á starfsfólkið að vera meðvitað um það hvernig best er að vinna til að tryggja hollustuhætti og öryggi matvæla. Starfsfólk þarf því að fá leiðbeiningar um rétta grímu- og/eða hanskanotkun.

Mikilvægt er að viðskiptavinir taki tillit til starfsmanna og annarra viðskiptavina og virði reglur um 2 metra fjarlægð (fyrirmyndarfjarlægð) við pöntun og afgreiðslu veitinga og einnig í biðröðum.

Heilbrigðiseftirlit Reykjavíkur hefur birt ýmsar gagnlegar upplýsingar á heimasíðu sinni er varðar COVID-19:

[Upplýsingasíða Heilbrigðiseftirlits Reykjavíkur vegna COVID-19](#)